




V E S S
VANUATU ENVIRONMENTAL
SCIENCE SOCIETY




**Stret Fasin blong Dil
wetem Kaofis - Ol Rul
blong Wok Folem long
Saed blong Turisim**



Stret Fasin blong Dil wetem Kaofis - Ol Rul blong Wok Folem long Saed blong Turisim

Kaofis hemi wan long olgeta spesel anamol lo Vanuatu mo fulap turis oli stap glad tumas taem oli lukim olgeta long solwota. Long Vanuatu, yu save lukim ol kaofis long fulap ples mo toktok i go raon se oli no fraet long ol man mo save mekem fren wetem. Yumi wantem se bae hemi stap olsem oltaem blong ol man mo ol turis tu oli save enjoem wan samting we oli neva save fogetem long laef blong olgeta. Be i nid blong meksua se kaofis hemi glad oltaem taem hemi stap lukim ol man mo ol turis. Ol toktok we i stap insaed long pepa ia hemi blong helpem ol man we oli dil wetem ol turis (hemia ol 'tourism operators') blong meksua se ol kaofis oli stap gud mo helti long ol yia we mbae oli kam. Ol kaofis oli impoten tumas long Vanuatu mo long saed blong turisim.

Stret fasin blong dil wetem kaofis mo ol rul blong wok folem i no blong ol man we oli ranem ol trip blong go lukim kaofis nomo. Be hemi blong ol narafala trip we maet ol turis oli lukim wan kaofis taem oli stap daeva, pul long kenu, ron long bot, o eni narakaen spot o aktiviti long solwota. Hemi blong ol turis bisnis klosap long solwota we kaofis i save kam klosap long so mo ol man we oli stap karem ol turis long solwota ingkludum ol wota taxi.



Meksua se yu mo ol staf blong yu, yufala evriwan i folem ol toksave long **“Ol Rul blong wok Folem wetem Kaofis”**. Ol rul ia oli ol stamba tingting biae long stret fasin blong dil wetem kaofis. Be yu we yu dil wetem ol turis, yu gat ol stret wok blong mekem antap long hemia:

- Yu mas letem ol kastoma blong yu oli save long “Ol Rul blong wok Folem wetem Kaofis”.
- Yu nao yu mas meksua se ol turis oli rispektem ol rul ia. Hemia i ingkludum ol turis we oli pas long so long ples blong yu blong go long solwota mo olgeta we oli stap long bot o mekem eni samting long solwota.
- Sapos bisnes blong yu hemi blong go lukim kaofis o ol narafala mamol blong solwota (kaofis, welfis, dolfen), yu mas gat wan permi folem loa blong Fiseri (2014).


Sapos yu stap yusum wan bot wetem enjin, meksua se yu save gud ol advaes we oli stap wetem ol rul mo yu folem gud. Hemia hemi aplae long ol banana bot, wota taxi, bot blong fising, seling bot, moto blong solwota, jet bot mo ol narafala moa we i usum enjin.

Sapos yu stap yusum wan bot we i no gat enjin o sapos yu **letem ol turis oli yusum** eni kaen bot olsem (bot, kayak, kenu, samting olsem), yu mas save gud ol advaes we oli stap wetem ol rul mo yu mas meksua se ol wokman mo ol kastoma blong yu olgeta tu oli save long hem mo folem gud.




Sapos yu lukim kaofis long skae kam daon

- Sapos yu stap flae long wan plen o wan helikopta, yu no mas flae kam daon bitim 300 mita antap long kaofis.
- Sapos yu stap flae long wan helikopta yu no mas stap antap long olgeta.
- Sapos yu stap flaem wan dron, hemi no mas flae kam daon bitim 50 m antap long kaofis. Rimemba se yu nidim wan permi blong flaem wan dron long Vanuatu (plis kontaktem Vanuatu Aviation Authority o Vanuatu Kaljoral Senta blong karem moa infomesen).



Sapos ol turis blong yu oli stap go long solwota wetem kaofis

- Givim smol toksave long ol kastoma blong yu long saed blong ol rul mo wanem oli shud mekem bifo oli go long solwota taem kaofis i stap klosap. Rimemba se hemi wok blong yu blong meksua se ol turis oli folem gud “Stret Fasin blong Dil wetem Kaofis”.
- Save gud ol advaes we i stap wetem ol rul mo meksua se yu mo ol wokman blong yu yufala i folem gud ol rul ia.
- Talem long ol turis blong yu se oli NO MAS swim blong go klosap long kaofis be oli mas wet blong kaofis i swim i kam sapos hemi wantem.
- Wan wokman we hemi gat save long ol toksave ia hemi mas stap oltaem long solwota wetem ol turis taem i gat kaofis klosap.
- I no shud gat bitim 4 turis mo 1 wokman klosap long wan kaofis mo oli mas stap 10 mita farawe long hem. Sapos i gat 5 man finis raon long kaofis, ol naraman oli mas stap 20 mita farawe.



- Meksua se ol turis oli no go klosap long tel blong kaofis mo tu oli no mas go klosap long wan mama we i gat bebe from sefti blong evriwan.
- Sapos kaofis i stap soem se i no glad o i fraet (olsem fasin long ronwe oltaem), bambae yu mas meksua se ol turis oli muvaot farawe long hem, 50 mita o moa.
- Talem long ol turis se i no gud blong tajem kaofis.
- No fidim kaofis mo no letem turis i fidim kaofis.
- Taem ol turis oli lukim kaofis, oli wantem tekem foto o rikodem vidio from oli wantem tingbaot taem ia. Taem oli stap tekem foto o filem blong kaofis, plis meksua se oli rispektem ol rul long saed blong kaofis: no traem blong go klosap tumas mo spolem kaofis blong karem wan gud "selfi" o foto. I moa impoten blong lukaot gud ol kaofis mo ol kastoma blong yu, bitim taem oli traem blong tekem wan gud foto.



Image: Big Blue Vanuatu


I gat ol loa long Vanuatu long saed blong kaofis

- Evriples long solwota blong Vanuatu hemi “Marine Mammal Sanctuary”. Hemi minim se loa blong fiseri nao mekem se i tabu blong spolem o kilem eni mamol blong solwota (kaofis, welfis, dolfen) long Vanuatu. Loa ia i talem se yu no mas kilim, plei raf, tekem, holem o blokem eni mamol blong solwota long Vanuatu “Marine Mammal Sanctuary”. Eni man we i brekem loa ia bae i save fesem wan faen we i save kasem VT50,000,000 o 2 yia long kalabus o tufala tugeta. Sapos oli faenem yu stret long taem we yu stap mekem wan samting we i brekem loa bae oli givim wan spot faen blong VT1,000,000 long yu.
- Sapos yu gat wan bisnes we i blong lukim kaofis, yu mas gat 2 permi, wan hemi permi blong Vanuatu Fisheries Department mo narawan hemi turisim permi. Bae i gat faen taem we oli faenem yu stap ranem bisnes olsem be yu no gat permi. Yu save faen long VT1,000,000 taem oli faenem yu.
- Sapos wan kaofis i kasem kil o yu kilim i ded, yu mas talemaot hariap long Vanuatu Fisheries Department. Kolem +678 23119 o +678 5333340. Sapos yu lukim wan kaofis we i sik, o i gat kil o i ded, yu mas talemaot long Vanuatu Fisheries Department o Vanuatu Environmental Science Society long emel vess@vanuatuconservation.org
- Sapos yu lukim se wan man we i ranem turis bisnes i no stap folem ol rul ia, yu save kolem Department of Tourism long +678 33400 mo toktok wetem wan ofisa blong minimum standeds long we.



Image: Big Blue Vanuatu

Sapos evri man we i gat turis bisnes long Vanuatu i folem gud ol “**Stret Fasin blong Dil wetem Kaofis - Ol Rul blong Wok Folem long Saed blong Turisim**”, bambae yumi hop se ol spesel anamol blong yumi ia bae oli stil hapi, helti mo gohed blong atraktem plante moa turis blong kam long kaontri blong yumi long fiuja. Mifala i hop se taem yumi folem gud ol rul blong lukaotem kaofis bambae yumi mekem ol turis mo ol kaofis tu oli harem gud. Yu save mekem i kam moa gud sapos yu mo ol wokman blong yu, yufala save moa long kaofis. Hemi impoten blong save laef blong olgeta, ol denja we oli stap fesem, mo wanem blong mekem blong lukaotem gud olgeta. Yu save talemaot ol infomesen ia o soem long ol turis blong yu blong meksua se oli enjoem taem blong olgeta mo long semtaem tu liftemap save long saed blong ol spesel anamol ia, i no long Vanuatu nomo be raon long wol.



Stret Fasin blong Dil wetem Kaofis - Ol Rul blong Wok Folem long Saed blong Turisim

Vanuatu Environmental Science Society (VESS) hemi mekem ol rul ia olsem pat blong projek blong kaofis mo gras blong solwota. Global Environment Facility (GEF) nao hemi givim mane blong projek ia. Projek ia we hemi blong ful wol, Dugong Secretariat of the Convention on Migratory Species (CMS) nao hemi sapotem mo Mohamed bin Zayed Species (MbZ) Conservation Fund i manajem project ia. VESS hemi ranem projek ia long Vanuatu wetem sapot blong Department of Environmental Protection and Conservation, Vanuatu Fisheries Department mo Department of Tourism.

